

12 APR 2002

Mahathir-Kelantan

MAHATHIR LAKUKAN LAWATAN SEHARI KE KELANTAN

KOTA BAHARU, 12 April (Bernama) -- Datuk Seri Dr Mahathir Mohamad tiba di sini pagi ini untuk lawatan kerja sehari ke Kelantan.

Perdana Menteri dan isteri Datin Seri Dr Siti Hasmah Mohamad Ali tiba dengan sebuah pesawat khas di Lapangan Terbang Sultan Ismail Petra di Pengkalan Chepa di sini pada pukul 8.40 pagi.

Perdana Menteri menghadiri majlis perjumpaan dan dialog dengan pegawai-pegawai kerajaan persekutuan di Dewan Utama Kampus Universiti Sains Malaysia di Kubang Kerian di sini pada pukul 9.15 pagi dan kemudian akan mengiringi Sultan Kelantan menunaikan solat Jumaat di Masjid Muhammadi di sini.

Pada sebelah petang, Dr Mahathir dijadual menghadiri Majlis Istiadat Penerimaan Penganugerahan Darjah Kebesaran daripada Sultan Kelantan di Istana Balai Besar.

Beliau akan menerima Darjah Kerabat Yang Amat Dihormati (DK) daripada Sultan Kelantan sempena ulangtahun keputeraan baginda yang ke-52, yang disambut pada 30 Mac lepas.

Dr Mahathir dijadual menghadiri majlis perjumpaan dengan anggota Badan Perhubungan Umno Kelantan di Istana Kota Lama di sini pada pukul 6 petang.

Pada sebelum malam, Perdana Menteri dan isteri akan menghadiri majlis jamuan rakyat bersama Sultan dan Raja Perempuan Kelantan di Istana Negeri, Kubang Kerian.

Menurut satu kenyataan Jabatan Penerangan di sini, Dr Siti Hasmah mempunyai jadual lawatan berasingan pada sebelah pagi, mengunjungi Yayasan Pemulihan Orang Cacat Kelantan di Jalan Padang Tembak, Pengkalan Chepa dan kemudian melawat Pondok Tok Selehor, Yayasan Darul Hanan di Kok Keli, Tumpat pada pukul 11 pagi.

Perdana Menteri dan isteri dijadual berlepas pulang ke Kuala Lumpur pada pukul 12.30 malam.

-- BERNAMA

WM BD RON